

# Mester recauda alrededor di 480 mil florin pa reparacion di Misa Santa Anna di Noord

## Dia 6 di November venidero lo organisa un RadioTelethon



Ayera mainta sr. Simon Arends a papia dilanti di prensa hunto cu demas miembronan di e Comision di Restauracion di Misa Santa Anna di Noord.



**ORANJESTAD** – Sr. Simon Arends kende ta presidi e Comision di Restauracion di Misa Santa Anna na Noord a informa cu e trabou di drechamento di e dañonan grandi cu un hos a ocasiona dia 25 di augustus ultimo na e misa menciona.

E reparacion di e dañonan aki tin un balor alrededor di 750 mil florin. El a bisa cu esaki ta inclui e reconstrucion y reparacion di e dak, altar, bankinan di e misa, y e imagennan religioso.

Sr. Arends a laga sa cu tur daño tin un gasto envolvi y cu mester busca fondo pa realisa e trabou di reconstrucion aki, ya cu “solamente solo ta sali por nada”. Pesey e miembronan di e comision aki

cu a keda constitui oficialmente dia 3 di october cu ta conta entre otro cu sra. Katty Ruiz-Paskel, George Metrey, sr. Ronny Brete y sr. Randolph Ruiz, lo organisa un serie di actividad pa asina recauda e fondonan necesario pa cuminsa cu e trabou di renobacion di Misa Santa Anna.

Eventualmente e compania di seguro lo reconoce un monto di alrededor di 270 mil florin pa e dañonan ocasiona pa e hos na final di luna di augustus ultimo. Ainda no tin un cifra exacto di locual seguro ta bay reconoce, segun sr. Arends. El a anuncia cu por lo menos nan mester recauda un suma di 480 mil florin y e meta ta pa yega na e fondo aki den transcurso di e

proximo tres luna. Mirando e situacion aki, “tur florin ta conta, asina sr. Arends a bisa, y esaki ta e slogan di nan campaña pa colecta fondonan pa drecha e misa Santa Anna di Noord. El a laga sa cu ya caba nan a manda carta na base personal na diferente compania cu lo por contribui cu suma mas halto na e fondo aki. Igualmente nan lo instala box na sitionan strategico cu lo ser controla regularmente.

Pa dia 6 di November venidero nan lo organisa un RadioTelethon for di 8’or di mainta te cu 6’or atardi, y nan ta spera cu dor di e actividad aki nan lo por recauda un fondo mas grandi. E actividadnan aki

ta conta cu sosten di diferente banda musical cu ya caba a mostra un interes grandi pa participa den eradiothon aki. E musico Robert Jeandor a laga sa cu lo tin musica y presentacion di banda musical, mariachi, grupo di baile, grupo di gaita, y nan lo a haci esaki cu hopi amor pa loke ta trata e reconstrucion di e misa.

Jeandor kende ta esun encarga cu e organizacion musical di e actividad aki a bisa cu nan lo percura pa e dia aki lo bira uno exitoso, y asina cumpli cu e meta di recauda tur fondo cu nan tin mester di dje. Lo tin bebida y cuminda disponibel tambe, y un tremendo ambiente amena entre otro dor di Oreo, Robert y su Solo

Banda Show. El a haci un yamada pa henter nos comunidad por contribui cu e bon obra aki. “Bin coopera cu Dios, no cu nos”, asina Jeandor a bisa.

Otro actividad cu nan tin programa bou guia di Kathy Ruiz-Paskel ta un “Sponsors Cocktail Night” cu lo tuma lugar dia 16 di december proximo. Tambe lo bay tin un caminata cu ayudo di IDEFRE dia 14 di januari 2012.

Na final di su declaracion sr. Simon Arends a bisa cu nan tin programa tambe e rifa di un auto entrante otro aña. Nan tin un cuenta disponibel pa tur esnan cu boluntariamente lo desea di duna un donacion pa e bon obra aki. □